


Moab llaktamunda Rutga alli warmi gajmi.
Libro de Rut capítulos 3-4




Shuj p'unllami Noemiga, “Kan alli kausachun kusada mashkana gani. Ñukuchij familiamunda Boozbuj sirvij warmigunan trabajangui. Kunun tutabi paiga cebadada wairachingu ringa. Kanga armarisha kuilla ashnariguj yakudash alli churanadash churarisha trillana pambamu ringui. Paibuj ñaubabi ama rikuringuichu. Pai maibi siririjta alli rikusha chimu risha cobijada alzachisha siriringui. Kan imada ruranadaga pailladi ningallami,” niga.



Rutga Noemida, “Kan nishka shina tukida
rurashami,” niga. Nishka k’ipaga trillana
pambamu rishaga Booz mikungagama, tuki
ubiangagama paibuj ñaubabiga ama ricurigachu.
Paibuj suedra nishka layami tukida ruraga.



Mikusha, ubiashaga kushillami Boozga grano
monton ladomu puñungu riga. Chibi puñukimi
Rutga allilla chayasha cobijada alzachisha siririga.
Chaubi tuta Booz shuj ladomu muyurishaga
chakibi shuj warmi siriguja sintishami manchariga.




Boozga, “¿Pidi gangui?” nisha tapuki
Rutga, “Kanda sirvij Rutmi gani,” niki
“Kunun kan allimi rurashkangui. Ama
manchichu. Imada kan mañakish ñukaga
rurashallami. Kambuj familia gashash ñukada
yalli kuchulla familia tiyan. Pai ayudash nishaga
ayudangami; mana nikiga Manduj Diosbish
rikugunmi. Kanda ayudangu ari nishami,” niga.



Boozga pueblo waiguna pungubi tiyarisha
paibuj familia runada rikusha nisha, “Uyi.
Noemimi Moab llaktamunda vueltamushka.
Paiga ñukuchij wawki Elimelec charishka
achpadami ashada katun. Kanmi randi pudingui;
na randish nikiga ñukallami randi pudini.”




Shina nikimi chi runaga, “Ñuka randisha,” niga.
Shina nikimi Boozga, “Noemij makimunda achpada
randi p’unlladami moabita viuda Rutgun kazarana
gangui. Chi achpash wañushka kusaj shutillabi
sakirichunmi chashnaga rurana gangui,” niga.



Shina nikimi chi runaga, “Shina gakiga na randi pudinichu. Ñuka charishkada na yanga chingachish ninichu. Ñukaj randi kan randish nishaga randilla. Ñukaga mana chaida ruri pudinichu,” niga.



Chi p'unllagunabiga familiaguna na randi
pudishaga kai shuj familiamu kushkada
rikuchingau, paibuj sandalia llujshisha
paibuj rijsishkamu kujmiga.



Shina kukimi pushaj yuyijkunada Boozga,
“Kununga kangunalladi rikunguichi. Elimelec buj
tuki ima charishkagundami Noemij makimunda
japini. Wañuj Mahlonbuj warmi Rutdaga ñuka
warmi gachunmi japini. Wañushka kusaj
achpagunash paibuj shutillabi sakiringa paibuj
shutida na kungarichun,” niga.



Chashnami Boozga Rutgun kazaraga. Pai chi warmibi chayarikiga, Mandaj Dios kukimi ijsayuj tukusha, shuj k'ari wawada chariga. Obed shutidami shutichigaguna.

Noemimu warmigunaga, “¡Diosmi kambuj familia tiyachun kai wawadaga kushka! ¡Kai wawa ñashaga alli nishka gachun!” nigaguna.

K'ipaga Obedga rey Davidbuj abuelomi tukuga.



Fares runaj wawa wawagunamundaga Davidmi:

- Faresbuj churiga Hezronmiga.
- Hezronbuj churiga Ram-miga.
- Rambuj churiga Aminadabmiga.
- Aminadab-buj churiga Naasonmiga.
- Naasonbuj churiga Salmonmiga.
- Salmonbuj churiga Boozmiga.
- Boozbuj churiga **Obed**miga.
- Obedbuj churiga **Isai**miga.
- Isaibuj churiga **David**miga.